

Koningin Wilhelmina Fonds celebrando 30 año



ORANJESTAD (AAN): Tabata na inicio di año 1961 cu e organizacion "Koningin Wilhelmina Fonds Kankerbestrijding Aruba" a ser funda. E organizacion aki a converti su mes den uno cu ta conoci cerca tur Arubiano, specialmente pa nan campañanan di recauda fondo y concientizacion, y mas aun mirando e hecho cu 30 año ya a pasa y e organizacion keto bay ta bayendo den bon rumbo.

Dialuna anochi, directiva di Koningin Wilhelmina Fonds

tabata tin un brindis na nan sede den Schotlandstraat, unda presidente Doortje Henriquez, cu ta ocupa e posicion aki caba desde 1980, a yama tur hende bon bini.

Presente tabata tambe e ex-presidentenan señora Do Tromp (presidente 1972-1977), Mathilda Gonzales (1979-1980), y Vera Henriquez, kende tabata presidente tempo cu su esposo tabata Gezaghgeber, y tambe Alix de Veer.

Cancer ta un di e malesanan

cu seguramente ta curable si e worde detecta na tempo. Segun DIARIO a compronde, Koningin Wilhelmina Fonds ta dunando hopi ayudo na e mundo medico aki na Aruba, y tambe pacientenan cu ta sufriendo di e malesa.

Ademas, nan ta percura pa pone panfleta cu informacion na diferente lugar, caminda esnan interesa por haya lectura di e malesa aki.

E recaudacion di fondo anualmente ta un di e actividadnan cu mas publicidad di e Koningin Wilhelmina Fonds. E campaña aki tradicionalmente ta cuminsa cu Gobernador di Aruba entregando e prome donacion.

Pa e gran trabao aki, DIARIO kier a felicita seguramente na nomber di Aruba, e organizacion incansable aki cu tin un solo interes: E salud di pueblo Arubano! Pabien!